

# حضرت بِلَال

HAZRATE BILAL  
KE ISLAM LAANE KA  
**WAQIYA**  
KYA THA?

**AMO**

# **HAZRATE BILAL**

**KE ISLAM LAANE KA WAQIYA KYA THA?**

**ABDE MUSTAFA**

**ABDE MUSTAFA OFFICIAL**

---

**WE ARE THANKFUL TO**  
**HAZRAT ALLAMA ALI RAZA QADRI ASHRAFI**

---





Qissa Sunane Waale Wayizeen Ki Zubaan Par Hazrat Bilal Radiallaho Ta'ala Anho Ke Islam Laane Ke Kayi Waqiyaat Mash'hoor Hain, Maslan:-  
Kuchh Masala Pasand Muqarrireen Kehte Hain Ke, Hazrat Bilal Apne Aqa Umaiyya Bin Khalaf Ki Bakriya Charate Huzoor Alaihissalam Ke Qareeb Se Guzre, Huzoor Alaihissalam Ne Farmaya Ke Aye Ghulam! Kya Tumhari Bakriyo Ke Thano Mein Doodh Hai? Unhone Arz Ki Ke Nahin, To Huzoor Ne Kaha Ke Mujhe Ijazat Do Main Khud Hi Nikal Leta Hoon, Hazrat Bilal Ne Arz Ki: Theek Hai To Nikal Lein Chunanche Huzoor Alaihissalam Ne Jaise Hi Thano Par Haath Lagaya To Doodh Bhar Gaya Aur Aap Ne Khud Bhi Nosh Farmaya Aur Hazrat Bilal Ko Bhi Ata Kiya Phir Hazrat Bilal Wahan Se Wapas Aa Gaye Aur Chand Dino Ke Baad Huzoor Alaihissalam Umaiyya Bin Khalaf Ke Ghar Ke Saamne Se Guzre To Dekha Ki Wahi Kaala Ghulam Pasine Se Sharabor, Bukhar Se Nidhal Chakki Pees Raha Hai Aur Behosh Ho Kar Girne Waala Hi Tha Ke Huzoor Ne Us

---

Ghulam Ko Chakki Se Alag Kiya Phir Uska Pasina  
Pochh Kar Paani Pilaya Aur Leta Diya Aur Phir  
Huzoor Ne Khud Chakki Chalayi, Jab Hazrat Bilal  
Jaage To Dekha Ke Ye To Wahi Hain Jinhone Bakri Ke  
Thano Se Doodh Nikala Tha, Phir Hazrat Bilal Ne  
Apna Haal Sunaya Ke Umaiyya Mujh Par Bahut Zulm  
Karta Hai....Bahut Kaam Karwata Hai.... Din Mein  
Bakri Charana.... Raat Mein Chakki.... Waghaira,  
Ye Sun Kar Huzoor Ne Farmaya Ke Tum Aaram Karo  
Tumhara Kaam Main Kar Deta Hoon Phir Huzoor Ne  
Kayi Din Tak Hazrat Bilal Ki Madad Ki To Hazrat  
Bilal Ye Dekh Kar Musalman Ho Gaye

Kuchh Log Is Waqiye Ko Is Tarah Bayaan Karte Hain  
Ke Hazrat Bilal Ko Maloom Hi Nahin Tha Ke Meri  
Madad Karne Waala Kaun Hai? Ek Din Dauran -e-  
Guftagu Hazrat Bilal Ne Kaha Ke Ek Shakhs Makka  
Mein Nuboowat Ka Daawa Karta Hai To Huzoor  
Alaihissalam Ne Farmaya Ke Main Wahi Shakhs Hoon  
To Hazrat Bilal Kalima Padh Kar Islam Mein Dakhil  
Ho Gaye

Is Tarah Ke Aur Bhi Kayi Qisse Mash'hoor Jise Aap  
Yun Samajh Lein Ke "Jitne Wayizeen Utne Waqiyaat"  
In Waqiyaat Ki Koi Asal Nahin Hai Kyunki Kisi Bhi  
Mustanad Kitab Mein Aise Waqiyaat Nahin Hai

---

Hazrat Bilal Radiallaho Ta'ala Anho Ke Islam Laane Ka Mustanad Waqiya Ye Hai Ke, Nabiye Kareem Sallallaho Alaihi Wa Aalihi Wasallam Aur Sayyiduna Siddique -e- Akbar Radiallaho Ta'ala Anho Ek Ghaar Mein Tanha Ibadat Mein Masroof The Ke Is Dauran Hazrat Bilal Radiallaho Ta'ala Anho Ka Wahan Se Guzar Hua, Wo Abdullah Bin Jud'an Ki Bakriya Chara Rahe The, Huzoor Alaihissalam Ne Ghaar Se Apna Sar -e- Anwar Baahar Nikala Aur Kaha Ke Aye Charwahe! Kya Thoda Doodh Milega? Hazrat Bilal Ne Arz Kiya Ke Mujhe Sirf Ek Bakri Ka Ikhteyar Hai, Agar Aap Chahein To Wo Aaj Aap Ko Pesh Kar Du? Huzoor Alaihissalam Ne Farmaya Ke Le Aao, Chunanche Wo Le Aaye, To Huzoor Alaihissalam Ne Apna Lakdi Ka Bada Pyala Mangwaya Phir Bakri Ko Bandh Kar Uska Doodh Duha To Pyaala Bhar Gaya Phir Aapne Nosh Farmaya Yahan Tak Ke Sair Ho Gaye Phir Duha Aur Sayyiduna Siddique -e- Akbar Ko Diya, Phir Duha Aur Pyala Bhar Ke Hazrat Bilal Ko Pilaya Yahan Tak Ki Wo Bhi Sair Ho Gaye Aur Abhi Bhi Bakri Ke Thanon Mein Doodh Bhara Hua Tha

Huzoor Ne Farmaya Ke Aye Ghulam! Kya Tum Islam Laoge? Ye Sun Kar Hazrat Bilal Huzoor Ke Qareeb Aaye Aur Islam Qabool Kiya Phir Huzoor Ne Farmaya Ke Apna Islam Chhupana Chunanche Inhone Aisa Hi

---



---

Kiya Aur Apni Bakriya Le Kar Chale Gaye  
Bakriyo Ka Zyada Doodh Dekh Kar Hazrat Bilal Ke  
Malikaan Ne Kaha Ke Lagta Hai Tumne Bakriya Bahut  
Achhi Jagah Par Charayi Hain, Chunanche Ab Ye  
Tumhari Zimmedari Par Hai  
Phir Hazrat Bilal Teen Din Tak Huzoor Alaihissalam  
Aur Sayyiduna Siddique -e- Akbar Ko Doodh Pesh  
Karte Rahe Aur Islam Ke Mutalliq Seekhte Rahe, Jab  
Chautha Din Hua To Abu Jahal Ka Guzar Abdullah Bin  
Jud'an Ke Ghar Ke Qareeb Se Hua To Wo Bola Ke Main  
Dekhta Hoon Ke Tumhari Bakriyo Ka Doodh Bahut Hota  
Hai, To Ghar Waalo Ne Kaha Ke Teen Din Se Aisa Hi  
Ho Raha Hai Aur Hum Nahin Jaante Ki Iski Wajah Kya  
Hai? Abu Jahal Bola Ke Tumhara Ghulam, Muhammad  
(Sallallohu Alaihi Wa Aalihi) Ke Rehne Ki Jagah Ko  
Jaanta Hai Lihaza Use Wahan Bakriya Charane Se  
Mana Karo, To Unhone Mana Kar Diya  
Phir Hazrat Bilal Radiallaho Ta'ala Anho Ek Din  
Khana -e- Kabah Mein Dakhil Huye Us Waqt Quresh  
Khana -e- Kabah Ki Dusri Taraf The, Aapne Jhank  
Kar Dekha To Koi Bhi Aapko Nahin Dekh Raha Tha,  
Aap Buto Ke Qareeb Gaye Aur Un Par Thookne Lage  
Aur Farmane Lage Ke Tumhein Pujne Waala Nakaam,  
Namurad Ho Gaya  
Quresh Ko Pata Chal Gaya Inhone Hazrat Bilal Ko

---

---

Pukara Magar Aap Bhag Kar Apne Aaqa Abdullah Bin Jud'an Ke Ghar Chale Gaye Aur Chhup Gaye,  
Mushrikeen Wahan Pahunche Aur Abdullah Bin Jud'an Ko Pukarne Lage, Wo Nikal Aaya To Inhone Us Se Kaha Ke Kya Tumne Deen Badal Liya Hai? Wo Bola Ke Mujh Jaise Shakhs Ke Baare Mein Tum Aisi Baat Keh Rahe Ho? Halanki Maine Laat Wa Uzza Ke Naam Par 100 Untniya Qurban Ki Hain, Is Par Mushrikeen Bole Ke Tumhare Ghulam Ne Aisa Aisa Kiya Hai, Ye Sun Kar Usne Hazrat Bilal Ko Pukara Aur Phir Mushrikeen Ke Hawale Kar Ke Bola Ke Ab Ye Tumhara Hai Iske Sath Jo Chahe Karo  
Mushrikeen Aap Radiallaho Ta'ala Anho Ko Le Kar Pathreeli Zameen Ki Janib Nikle Aur Phir Aapko Tapti Huyi Zameen Par Lita Diya, Phir Unhone Aap Ke Kandho Par Chakki Rakh Di Aur Kehne Lage Ke Muhammad (Sallallaho Alaihi Wa Aalihi Wasallam) Ka Inkar Karo Magar Aap Farmate Ke Nahin Karunga, Aur Phir Aap Wahdaniyat Ka Nara Bhi Lagate, Isi Dauran Hazrat Abu Bakar Siddique Radiallaho Ta'ala Anho Ka Udhar Se Guzar Hua, Farmaya Ke Tum Is Ghulam Ko Kyun Maar Rahe Ho? Tum Isse Kisi Ke Qisas Ka Mutalba To Nahin Kar Rahe?  
To Umaiyya Bin Khalaf Ne Apne Sathiyo Se Kaha Ke Kya Main Tumhein Abu Bakar Se Aisa Khel Khel Kar

---



---



Na Dikhaun Jaisa Kisi Ne Bhi Na Khela Ho? Phir Hansne Laga Aur Bola Ke Aye Abu Bakar! Ye Ghulam Tere Deen Par Hai Ise Humse Khareed Lo, Siddique -e- Akbar Radiallaho Ta'ala Anho Ne Farmaya Theek Hai, Wo Bola Ke Mujhe Apna Wo Ghulam De Do Jo Lohaar Hai, Is Par Sayyiduna Siddique -e- Akbar Ne Kaha Ke Agar Main Sauda Manzoor Kar Loon To Kya Tum Mujhe Bilal De Doge? Is Par Wo Bola Ke Haan De Dunga, Aapne Kaha Ke Chal Maine Apna Ghulam (Jo Lohaar Hai) Tujhe Diya, To Wo Hansne Laga Aur Bola Ke Nahin! Jab Tak Tum Uski Biwi Aur Beti Bhi Saath Mein Nahin Doge Tab Tak Main Bilal Ko Nahin Dunga, Aapne Farmaya Ke Agar Main Ye Sauda Karu To Kya Tu Bhi Karega? Wo Bola Ke Haan, To Aapne Farmaya Ke Chal Ye Sab Bhi Tera Hua!, Wo Phir Hansne Laga Aur Bola Ke Nahin! Mujhe Iske Saath 200 Dinaar Aur Chahiye Tab Aapko Bilal Milega, Aapne Farmaya Ke Tu Aisa Shakhs Hai Jise Jhoot Bolte Huye Bhi Sharm Nahin Aati, Ye Sun Kar Wo Bola Ke Laat Wa Uzza Ki Qasam Agar Tum Ye Sauda Karo To Main Zaroor Tumhein Bilal De Dunga, Ye Sun Kar Siddique -e- Akbar Radiallaho Ta'ala Anho Ne Farmaya Ke Maine Tujhe Ye Bhi Diya, Ye Sab Tera Hua Phir Aapne Hazrat Bilal Radiallaho Ta'ala Anho Ko Le Liya

---

---

(تاریخ ابن عساکر، جلد 6، صفحہ نمبر 223)  
(سیرت حلبیہ، جلد 1، صفحہ نمبر 422)  
(جامع الآثار، جلد 3، صفحہ نمبر 1472، 1473)  
(ملخصاً، جمال بلال رضی اللہ تعالیٰ عنہ از علامہ محمد علی رضا اشرفی مدظلہ العالی)

---



**ABDE MUSTAFA OFFICIAL**